

Date – 12/07/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

AKASHVANI AIZAWL

1. Fur ruahtui sur in chuan Mizoram hmun hrang hrangah chhiatna a thlen thu hriat belh zel ani.
2. Lok Sabha MP leh MLA 2-te’n Mizorama kawngpui siam leh lei dawh chungchang Union Minister of State an sawipui.
3. Enforcement Directorate (ED) Guwahati Zonal office a thawkte chuan tun hnai khan Champhai a dawr 3 tiamin kuhva ro hmanga dan kalha sumdawngte chenna in leh dawr 20 an dap.
4. World Cup Football semi final-ah France leh Spain, England leh Argentina an intum dawn.

<><><>

MONSOON HAVOC

Fur ruahtui sur chuan Mizoram hmun hrang hrangah chhiatna a thlen thu hriat belh zel a ni a, Lunglei leh Lawngtlai district-ah chhiatna a thleng nasa zual ni a thudawn a ni.

Disaster Management & Rehabilitation department hnuai a State Emergency Operation Centre chhinchhiah danin Lawngtlai district-a Myanmar ramri bula awm Zochachhuah khua-ah nimin khan Synod hnathawkte chenna tur in sak mek chu leiminin an chhilh hneh hle a, in hi sak zawm theih chi rual a nih loh bakah insakna hmanrua leh bungrua - cement ip 20, tile phok 55, inchunga hman tur ranva bandel 9 leh a chanve, thingzai leh hnathawkte bungrua zawng zawng pawh a chim hnan vek a ni. Nimin piah khan Zochachhuah khua-ah vek hian ruah a sur tam avangin tui lianin chenna in 7 a chim pil vek a, an inchhung bungrua tam tham tak tuilianin a len bo bawh a ni. Lawngtlai district vek Chawngte khua a Kamalanagar 5 a chenna in pahnih chu tuilianin a chim avangin rauhsan a ni a. Sumsilui lian avangin Udalthana khua a chhungkaw 4-te leilet zau tak leh chhungkaw pakhat sangha dil chu a chim pil a an thlai leh sangha khawite a chhe vek a ni.

Lunglei district a Khawthlangtuipui kama awm Tlabung leh a chhehvela khaw thenkhat chu tuilianin a chim avangin chhungkaw za chuang hmun himah an inthiar chhuak a. Tlabung khua-ah chhungkaw 80 vel hmun him lamah suanchhuah an ni a, sawnchhuah te hi Shelter House ah te leh chhungte bel in an khawsa a, Shelter House bikah hian chhungkaw 4 vel chentir mek an nih bakah sorkar leh vantlang

hall-ah te awmtir an ni . SDO (C) Tlabung Pu Moses Lalfakawma hnen atanga thudawn danin tuilian vanga sawnchhuah te bungrua tam ber chu Shelter House-ah dah a ni a, chhungte bel a khawsa a tam zawk an ni a ti. Tun dinhmunah tlemin ruahtui a kam leh hret avangin a ziaawm deuh a, Bawngveng velah chuan lawng a kal kai ngai-in a awm a, YMA Hall thlang Licheng Field bul vel leh Post Office thleng vel tuin a chim a, chhungkaw 10 vel in an tuar a, Bazar pui tak erawh a la him rih a ti. Tipperaghat khua a chhungkaw 26 chu hmun hima thiarchhuah an ni a, Nunsury-1 ah chhungkaw pariat suan chhuah an ni bawk.



CBCI

India rama Catholic kohhran thuneitu sang, Catholic Bishop's Conference of India, (CBCI) Official Advisor, Pu Jonathan Lalremruata hovin CBCI hruaituten Foreign Contribution (Regulation) Act (FCRA) chungchangah Union Home Minister Amit Shah hnenah Memorandum an thehlut.

CBCI hruaitute hian Union Home Minister hi Zirtawpni khan Delhi-ah hmu in Foreign Contribution Regulation Act bakah sakhaw zalenna chungchangah leh Manipur buaina chungchang Memorandum an thehlut a. Amit Shah hi Home Secretary Pu Govind Mohan leh official dangten an tawiawm a, memorandum thehluh chungchang hi an sawi ho nghal ani. Union Home Minister chuan FCRA hi Kristian bik bitumna a ni lo tih sawiin, kum kalta khan FCRA hmangin cheng Vaibelchhe 17,000 bawr hmuh a ni , a ti a pumpui atanga za a 13, cheng Vaibelchhe 3,000 bawr vel chu Kristian organisation tan a ni a ti a. FCRA chu kum 2010-a bill siam tawh niin, ram leh hnam kalh zawng (anti national activities) atana hman a nih loh nan te, a nihna tur ang taka hman a nih theih nan he dan hi siamthat tum a ni a ti a. Kohhran leh a hnuaia hmalakna peng hrang hrang bakah sakhaw dang, emaw Foreign Contribution hmang tangkaitu emaw eng pawl mah bitum bik an awm lo tih sawiin, Kristian pawl hrang hrangte’n kum tam tak India hmasawinna atana hna an thawhna a hriatpui a ti a. CBCI in FCRA Bill hnukkir tura an ngenna chu tun parliament Fur thutkhawm lo awm turah sawi ho tura chhawpchhuah tum a nih thu a lo hrih bawk a ni.

Union Home Minister chuan Kristiante nekchepna reng rengah FIR thehlut thin tur te, ngaihsak loh, hmalakna awm lo leh duhkhawp lohna a awm a nih chuan Ministry of Home Affairs-ah thlen a, mimal taka a lo bawhzui thin tur thu a sawi a. Kristian pawl hrang hrangte FCRA avanga an sum hmuhna tihtawp sak leh harsatna an tawh zawng zawngte la khawm a, ziaka a hnena thehlut tura ngenin, Ministry of Home Affairs in lo enzui a, bawhzui a tiam a ni.



ROAD PROJECTS

Lok Sabha MP Pu Richard Vanlalmangaiha, MLA 2 Lt. Col. Clement Lalhmingthanga leh Pu T. Lalhlimpuia ten Union Minister of State for Road Transport and Highways (MoRTH), Ajay Tamta hnenah Mizoram PWD-in National Highway leh lei pawimawh tak tak sak leh thawmthat a dilna chu a rang thei ang bera tihlawhtling turin an ngen.

Lok Sabha MP leh MLA 2 te hian Zirtawpni khan Union Minister of State hi a chenna inah an hmu a. Pu Richard Vanlalmangaiha chuan Mizoram PWD-in

National Highway-306A , kilometre 45 atanga kilometre 102 inkar thawmthatna tura cheng vbc 99 leh nuai 78 a dil chu pe chhuak thuai turin Union Minister hi a ngen a. Hei bakah hian NH-108-a Langkai luia lei (permanent bridge) dawh leh Teirei Luia lei an hman mek Bailey bridge hlui tawh tak thlakna tur lei nghet leh rin tlak tak sak dilna pawh tikhawtlai lova pawmsak thuai turin a ngen bawk a. Heng lei pahnih sakna tura Detailed Project Report (DPR) chu thla hmasa ni 9 khan thehluh a ni tawh tih sawiin, heng lei pahnihte hi Mizoram leh state thenawm Tripura inkalpawhna atan a pawimawh hle tih a sawi a ni.

Lunglei West Bialtu MLA Pu T. Lalhlimpaia chuan Lunglei Western Bypass Road Project, kilometre 28 chuang a thui siamna tur cheng vbc 213 leh nuai 60 pawmsak turin Minister a ngen a, he bypass road hi siam zawh a nih chuan Lawngtlai District bakah Kaladan Multi-Modal Transit Transport Project, Siaha District, Chakma Autonomous District Council Headquarters, leh Tlabung Border Trade Centre kalpawhna turah hmasawnna nasa tak a thlen dawn bakah lirthei tawt lutuk thin pawh a tiziaawm dawn a, NHIDCL-in MoRTH hnena Lunglei Western Bypass DPR a thehluh tawh chu pawmsak thuai turin a ngen a. Hei bakah hian Lunglei West Bialtu MLA chuan NHIDCL-in Hrangchawkawn atanga Lunglei inkar NH-302 kawng an laih zaua leimin avanga Theiriath khuaa chengte'n harsatna hrang hrang an tawh te chu thlenin, Theiriath khaw kawng lailawk siamna tur cheng nuai 110 sing 4 leh sang 9 rawtna a thlen bawk a, Union Minister Ajay Tamta chuan an thil ngen te hi tihhlawtlin a nih ngei theih nan hma a lo lak tur thu a lo hrilh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ED RAIDS

Enforcement Directorate (ED) Guwahati Zonal office a thawkte chuan tun hnai khan Champhai a dawr 3 tiamin kuhva ro hmanga dan kalha sumdawngte chenna in leh dawr 20 an dap.

ED hnathawkte'n an dapte hi Mizoram, Assam, West Bengal leh Uttar Pradesh-ah te a ni a. An in leh dawr dap tak neitute hi kuhva ro a sumdawnna sum chheprelh a puhte an ni. Champhai district bika dawr leh in an dapte hi - Hmingthanzami (Beki Kuhva Dawr neitu), Lalrinchhani (L R Store neitu) leh Lalenkawli (K.L. Store neitu) te an ni a. Kar kalta Thawhtanni khan an dap a ni. Kuhva ro tawlhruk hmanga sumdawng liante hian Mizoram a an thurualpuite hi an hmang tangkai hle niin ED official-te chuan an sawi a. Kuhva ro hi Myanmar atangin Champhai district a Tiau lui kaltlanga India ram hmun danga phurh luh a ni tih an sawi a. Tuna an chhui bik hi chu Assam, West Bengal leh UP lama phurh luhna kawng leh sum an chhehrelh dan vel a ni a. Tuna an hmuh chhuah chin hi cheng vaibelchhe 1,500 vel a nih thu an sawi a ni.

<><><>

MIZO TT STAR

Mizo Tlangval Table Tennis Star-Lalrinpuia’n US National championship U2600 - Singles ah Gold hlawh chhuakin a Champion.

Akashvani News Aizawl-in a kawmnaah Lalrinpuia chuan kum 2024 kum atang khan India Community Centre- Milpitas California ah coach cum player hna thawkin a awm a, tun thla (july) Ni 3-9 khan US national championship-a rating event sang ber -U2600 Singles inelna ah, hlawhtlinna duhawm tak chang-in a Champion a ni. He tournament-ah hian match group 3-ah match 9 a khel a, hnehna chang vekin, final ah hian Ved Seth men’s national team a awm mek nen inhmachhawnin, 3-1 in hnehna a chang a. Lalrinpuia hi Coach cum player niin tun tournament bikah hian a zirlai 13 tel an awm a, an vaiin medal 15 an hawn thu a sawi bawk.

<><><>

WORLD CUP

World Cup Football khelh mekah semi final-a intum turte a hriat kim tawh a, semi final hmasa zawk hi tunkar Nilaini zanlai dar 12:30-ah France leh Spain-in an khel ang a, Ningani zanlai dar 12:30-ah England leh Argentina-ten semi final hnukung zawk an khel ang.

Tukina quarter final inkhelah England-in goal 2 goal 1-a Norway hnehin semi final an lut a, champion lai Argentina-in goal 3 goal 1-a Switzerland hnehin semi final an lut bawk a ni.

Semi final-a chak ram 2-ten July ni 20-ah khian New York-New Jersey Stadium-ah final an khel ang.

<><><>